



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Baucau
17 Agostu 2016

JSMP husu ba Ministériu Públiku atu dezenvolve akuzasaun ne'ebé adekuaudu no komprensivu ba krime violénsia doméstika sira

JSMP husu ba Ministériu Públiku atu dezenvolve akuzasaun ne'ebé adekuaudu no komprensivu ba kazu violénsia doméstika atu asegura sentensa ne'ebé apropiadu tuir krime hirak-ne'e nia gravidade.

JSMP preukupa ho akuzasaun iha kazu rua ne'ebé julga iha Tribunál Distritál Baucau, iha 10 no 22 Juñu 2016; tanba akuzasaun ne'e la reflète sirkunstánsia sira relaciona oinsa no meiu ka objektu sira ne'ebé arguidu sira uja hodi komete krime no mós potencia no risku ba vítima violénsia doméstika sira nia vida.

“Ministériu Públiku tenke elabora no formula akuzasaun ida-ne'ebé komprensivu atu asegura katak meiu ka objektu sira ne'ebé arguidu sira uja hodi komete krime akomodadu iha akuzasaun. Juiz sira mós iha kompeténsia tuir lei atu altera krime ne'e, antes halo desizaun finál, kuandu nesesariu atu halo ida-ne'e ba interese justisa” dehan Diretór Ezekutivu JSMP, Luis de Oliveira Sampaio.

Iha JSMP ninia monitorizasaun ba kazu ida-ne'ebé julga iha 23 Juñu 2016 ho númeru prosesu 0006/14.MMNTB, Ministériu Públiku akuza katak iha 29 Dezembru 2014 dadersan, arguidu lori katana taa dala 1 iha lezada nia ulun. Aktu ne'e rezulta lezada konsege ba halo tratamentu iha Sentru Saúde Natarbora, no suku pontu 4 iha lezada nia ulun ne'ebé kanek.

Iha kazu seluk ne'ebé JSMP observa iha 22 Juñu 2016 ho númeru prosesu 0010/15.BCQI, Ministériu Públiku akuza katak iha 19 Novembru 2015, iha tuku 12.00 meudia, arguidu foti ai-pedasuk baku dala 2 iha lezada nia ulun halo lezada oin nakukun no monu ba rai. Wainhira lezada hader atu halai ba fo hatene iha polísia, arguidu kontinua baku tan dala 4 iha lezada nia kotuk laran, baku dala 2 iha lezada nia kabas no baku dala 2 iha lezada nia ain-tu'ur. Aktu ne'e rezulta lezada konsege ba halo tratamentu iha Sentru Saúde Baguia.

Iha kazu rua ne'e, Ministériu Públiku akuza arguidu nain rua ne'e kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa no konjuga ho artigu 2, 3 no 35 Lei Kontra Violénsia Doméstika (LKVD).

Rua setubal, Colmera, Dili Timor Leste
PoBox: 275

Telefone: 3323883 |77295795

www.jsmp.tl

Facebook: www.facebook.com/timorleste.jsmp

Twitter: @JSMPtl

JSMP hanoin katak faktu sira ne`ebé asociadu hosi krime ne`e prienxe elementu krime tentativu omisídiu ka ofensa ba integridade fízika grave tanba arguidu sira manifesta intensaun atu hamosu perigu ba lezada nia vida. Objeytu ka meu hirak ne`ebé arguidu uza hodi ezekuta krime ne`e, manifesta arguidu iha intensaun atu hamosu risku ka iha potencia atu hamosu risku seriú ba lezada nia vida. Aleinde ne`e, alvu (*sasaran*) ne`ebé arguidu dirije aktu ne`e ba kedas fatin sira ne`ebé bele kauza lezada lakon nia vida. Tuir loloos Ministériu Públiku tenke asegura katak akuzasaun ne`e tuir duni faktu hosi krime ne`e.

Iha kazu rua ne`e, arguidu ida uja ai-pedasuk (ai-sunu) no baku loloos ba lezadu nia ulun no arguidu ida seluk uja katana hodi taa iha lezada nia ulun no halo agresaun intensivamente hasoru lezada. Aktu rua ne`e iha potencia atu hamosu perigu ba lezada nia vida. Tanba ne`e JSMP hanoin katak tuir loloos Ministériu Públiku tenke akuza ho artigu 146 letra (e) Kódigu Penál no konjuga ho tentativa omisídiu tuir artigu 138 no 23 Kódigu Penál ho Artigu 35 Lei Kontra Violénsia Doméstika (LKDV).

JSMP preukupa tanba sasan todan no kroat sira hanesan ai-padasuk (ai-sunu), katana, diman, besi-kanu ne`ebé arguidu uza hodi lansa atake ba lezada manifesta arguidu nia intensaun atu kauza kanek todan ba lezada ka ita tenke fiar katak aktu ne`e iha potencia atu halakon lezada nia vida. Tanba ne`e JSMP husu ba Ministériu Públiku no Tribunál tenke ho kuidadu avalia instrumentu ka objetu sira ne`ebé arguidu sira uza atu realiza sira nia intensaun aat no rezulta finál hosi krime ne`ebé komete.

JSMP enkoraja autór judisiáriu sira atu ho kuidadu ezamina no avalia sasan kroat sira ne`ebé uza no fator agravantes sira seluk ne`ebé relasiona ho krime hirak ne`e antes determina akuzasaun no sentensa ne`ebé apropiadu liu.

JSMP mós husu atu asegura katak arguidu sira hetan akuzasaun no sentensa ne`ebé apropiadu wainhira iha intensaun atu kauza kanek sériu ba lezada, partikularmente uja sasan kroat, sei prevene krime hirak ne`e iha futuru, no haruka mensajem ba comunidade katak violénsia doméstika nu`udar krime sériu tuir Kódigu Penál no Lei Kontra Violénsia Doméstika (LKDV).

JSMP mós dalabarak ona rekomenda atu dezenvolve mata dalan legál kona-ba akuzasaun no sentensa ba kazu violénsia doméstika atu garante katak akuzasaun hotu dezenvolve iha maneira ida-ne`ebé klaru no sensitivu atu fo fatin ba sentensa ne`ebé reflète krime ne`e nia gravidade.

Atu hetan informasaun kompleitu bele kontaktu:

Luis de Oliveira Sampaio
Diretór Ezekutivu JSMP
Alamat e-mail: luis@jsmp.minihub.org